

სანვრთნელი შეხვედრა “ოლიმპიასთან”

თბილისი. “ლოკომოტივის” სტადიონი. 28 იანვარი.

“დინამო” (თბილისი) – “ოლიმპია” (ლიუბლიანა, იუგოსლავია) 3:1 (0:1).

“დინამო”: ქანთარია, სვანაძე, ჩივაძე, თევზაძე (უკლებს), არზიანი, კაკილაშვილი, სიჭინავა, სულაქველიძე, ჩქარეული (გოგრიჭიანი), ცაავა (ჟორჟიკაშვილი), გურული.

“ოლიმპია”: ბელოვეჩი, ვუკმროვიჩი, როდოვიჩი, შარენეცი (ლალოვიჩი), ბოროვნიცა, ტერჩიჩი, ვუინოვიჩი (დომადენიჩი), ამერშაკი (პატე), ტეტრავიჩი, კოტანეცი, როჟიჩი (ვოლჩი).

მსაჯი: მ. კობიაშვილი (გორი).

გაათვრთხილეს კოტანეცი.

“ლოკომოტივის” სტადიონზე გუშინ მოსულ მაყურებელს სათამაშო მინდორი დათოვლილი დახვდა, რასაც შეიძლება მნიშვნელოვანი სიძნელეები შეექმნა ფეხბურთელებისთვის და დაეჭვეთებინა კიდევ თამაშის სანახაობრივი მხარე, მაგრამ წვრთნა წვრთნაა, რაკი თბილისელ და ლიუბლიანელ ფეხბურთელებს საკმაოდ პრობლემები აქვთ ახალი სეზონის წინ, ამიტომ მეტეოროლოგიური ხასიათის სირთულეები მათთვის წვრთნის დამატებითი სპეციფიკური წინააღმდეგობაც კი იყო.

დათოვლილ მინდორზე ხტუმრები პირველ ტაიმში უკეთ თამაშობდნენ. მართალია, დინამოელები მეტს უტევდნენ, ტერიტორიულ უპირატესობასაც ფლობდნენ, მაგრამ “ოლიმპია” ხშირად ახორციელებდა კონტრიერშიებს და სწრაფი, შორეული გადაცემებით გადაჰქონდა ბურთი მეტოქის ნახევარზე. ერთ–ერთი ასეთი კონტრშეტევისას “დინამოს” მცველებმა მარჯვენა ფლანგზე ვერ მოიგერიეს ბურთი, როჟიჩმა კარის წინ ჩაანოდა და სრულიად ღიად დარჩენილმა კოტანეცმა მაღალ ნახტომში თავით გაიტანა პირველი გოლი – 1:0.

ლიუბლიანელები, საერთოდ, თავით უკეთ თამაშობდნენ და ეს განსაკუთრებით იგრძნობოდა პირველ ტაიმში, მაგრამ შესვენების შემდეგ დინამოელებმა შეცვალეს თამაშის ტაქტიკა, საგრძნობლად მოუმატეს ტემპს, ინდივიდუალური გარღვევების ნაცვლად რიგიანად ააწყვეს კოლექტიური თამაში და თითქმის მთელი ტაიმი მასპინძლებმა სტუმრების ნახევარზე გაატარეს. ჩვენს თავდამსხმელებს აქტიურად დაუჭირეს მხარი ნახევარმცველებმა და მცველებმაც. ყველაფერმა ამან სათანადო შედეგი გამოიღო: 61–ე წუთზე შორი მანძილიდან ჩივაძის დარტყმული საჯარიმო მეკარემ ვერ შეაჩერა და მოგერიებულ ბურთს ყველაზე ადრე კაკილაშვილმა მიუსწრო – 1:1. ზუსტად 10 წუთის შემდეგ გურულმა შორიდან დაარტყა საჯარიმო, მეკარე ბელოვეჩი შეფერხდა და მეორე ბურთი გაუშვა, სულ მალე კი სულაქველიძე–თევზაძის მიერ გათამაშებული სწრაფი, ზუსტად გაანგარიშებული კომბინაცია მესამე გოლით დაამთავრა სიჭინავამ – 3:1.

იუგოსლავიელი ფეხბურთელები 31 იანვარს და 3 თებერვალს თბილისში კიდევ 2 სანვრთნელ მატჩს გამართავენ თბილისის “დინამოსთან” და ქუთაისის “ტორპედოსთან”.

ბიჭიკო ქორიძე.

მატჩის შემდეგ

თბილისის “დინამოს” უფროს მწვრთნელს დავით ყიფიანს ვთხოვეთ შეეფასებინა განვლილი შეხვედრა. აი, რა გვითხრა მან:

– ჩვენი ფეხბურთელების მატჩები თბილისთან დაძმობილებული ქალაქის, ლიუბლიანის “ოლიმპიასთან” სასიამოვნო ტრადიციად იქცა. სამწუხაროდ, ამჯერად ამინდი არ იყო ისეთი, როგორსაც ფეხბურთელები და მაყურებლები ინატრებდნენ. ცხადია, დათოვლილო მინდორზე, საკმაოდ ცივ ამინდში, ძნელი იყო იმ ლამაზი, კომბინაციური ფეხბურთის ჩვენება, რომელსაც გულშემატკივარი მოელის ჩვენგან. მაგრამ მიუხედავად ამისა, არა მგონია, რომ სტადიონზე მოსულნი თამაშით უკმაყოფილო დარჩენილიყვნენ. მატჩი, განსაკუთრებით მისი მეორე ტაიმი და პირველის მიწურული, ცოცხალი და სანახაობრივად საინტერესო გამოდგა.

რაც შეეხება ჩვენს მეტოქეს, ლიუბლიანის “ოლიმპიას”, იგი, ჩემი აზრით, საკმაოდ ძლიერი გუნდია. თუ იმასაც გავითვალისწინებთ, რომ იუგოსლავიის ეროვნულ ჩემპიონატში ახლა მხოლოდ დროებითი შესვენებაა და პირველობაში მონაწილე ყველა გუნდი საბრძოლო სპორტულ ფორმაშია, შემძლია განვაცხადო, რომ თბილისის დინამოელთა დღევანდელმა ფიზიკურმა მომზადებამ სავსებით დამაკმაყოფილებელი შთაბეჭდილება დატოვა.

საუბარი ჩაინერა დავით კაკაბაძემ.

“ლელო”, 29 იანვარი, 1984 წ.